

आकाशवाणी

खबरां विजय बजाज कोला

पैहले खास-खास खबरां:-

1. प्रधानमंत्री नरेन्द्र मोदी होर अज्ज वीडियो कांफ्रेंसिंग दे राएं 18में रोजगार मेले च बक्ख-बक्ख सरकारी मैहकमें ते संगठनें च नमें नियुक्त 61 जहार शा मते नौजवानें गी नियुक्ति-पत्र जारी करगंन।
2. केन्द्र सरकार नै उत्पादन आधारित प्रोत्साहन यानि PLI योजना दे चौथे गेड़ च 5 कम्पनियें दी ताल कीती ऐ।
3. चुनां आयोग नै सब्भनें राज्यें ते केन्द्र शासित प्रदेशें दे मुख चुनां अधिकारियें गी कुसा बी कोताही दे मामले च बूथ स्तह दे अधिकारियें खिलाफ अनुशास्नात्मक कारवाई दा हुकम जारी कीता ऐ।
4. गृहमंत्री अमित शाह अज्ज लखनऊ च उत्तर-प्रदेश दिवस आले समारोह च मुख परौहने दे तौरा पर शामिल होगंन।
5. रुस, यूक्रेन ते अमरीका दे प्रतिनिधियें यूक्रेन जंग खत्म करने दे बारे च कल अबुधाबी च पैहले दौर दी गल्लबात कीती।
6. मर्दे दे टी-20 अंतराष्ट्रीय क्रिकेट च भारत नै कल रायपुर च खेड्डे गेदे 5 मैचें दी श्रृंखला दे दूए मुकाबले च न्यूजीलैंड गी 7 विकटें कन्नै हराई दिता ऐ।

<><><><><><>

PM -Rozgar Mela

प्रधानमंत्री नरेन्द्र मोदी होर अज्ज वीडियो कांफ्रेंसिंग दे राएं आयोजित 18में रोजगार मेले च बक्ख-बक्ख सरकारी मैहकमें ते संगठनें च नमें नियुक्त 61 जहार शा मते युवाएं गी नियुक्ति-पत्र जारी करगंन। ओह इस मौके पर युवाएं गी सम्बोधित बी करगंन। 18मां रोजगार मेला 45 थहारें पर आयोजित कीता जा रदा ऐ। इनें युवाएं गी गृह मंत्रालय- सेहत ते परिवार कल्याण मंत्रालय- वित्तीय सेवा विभाग- उच्च शिक्षा विभाग ते होरनें विभागें च नियुक्ति होग। रोजगार सृजन आस्तै सरकार दी प्रमुख पैहल- रोजगार मेले च हुन तगर देश भरें च 11 लक्ख शा मते नियुक्ति पत्र जारी कीते जाई चुके दे न।



Govt. PLI Scheme

केन्द्र सरकार नै वाईट Goods यानि वाशिंग मशीन- फ्रिज- डिशवाशर ते ए.सी. जनेई घरेलू उपकरणें लेई उत्पादन -आधारत प्रोत्साहन यानि PLI योजना दे चौथे गेड़ च 5 कम्पनियें दी ताल कीती ऐ। इनें कम्पनियें 863 करोड़ रुपें दी रास- पूंजी दी प्रतिबद्धता जताई ऐ। उद्योग ते बपार मंत्रालय नै दस्सेया ऐ जे एह कम्पनियां ए.सी दे पुर्जे दा निर्माण करदियां न। माली बरे 2027-28 तगर इंदे शा कुल 8 जहार 300 करोड़ रुपें शा मते दे उत्पादन ते इक जहार 799 बादू प्रतक्ख रोजगार पैदा होने दी मेद ऐ। मंत्रालय नै दस्सया ऐ जे हासल होए दे 13 आवेदनें दे मूल्यांकन दे बाद इनें 5 कम्पनियें गी अस्थाई तौर पर चुनेया गया ऐ। अजे तगर PLI आयोग दे तैहत कुल 85 कम्पनियें दी ताल करी लैती गेदी ऐ।



ECI-BLO Directions

चुनां आयोग नै सब्भै राज्यें ते केन्द्र शासित प्रदेशें दे मुख् चुनां अधिकारियें गी कुस्सै बी कोताही दे मामले च बूथ सतह दे अधिकारियें दे खलाफ अनुशासनात्मक कारवाई करने दा हुकम दिता ऐ। चुनां आयोग नै आखेया जे ड्यूटी च कोताही- लापरवाही- जानी -बुज्झियै आयोग दे हुकमें दी पालमा नैई करने जां जनप्रतिनिधित्व अधिनियम-1950 ते मतदाता पंजीकरण नियम - 1960 दे प्रावधानें दे उल्लंघना दे मामलें च निलंबन सनें सख्त कारवाई होग। आयोग नै अगगे आखेया ऐ जे बी.एल.ओ दी कुसै बी ऐसी कोताही कन्ने जेहदे नै मतदाता सूची दी प्रामाणिकता जां विश्वसनीयता पर असर पौंदा होए- ओहदे कन्ने सख्ती नै निबड़ेया जाहग। आपराधिक दुर्व्यवहार पर FIR बी दायर कीती जाई सकदी ऐ।



HM -UP Day

केन्द्री गृहमंत्री अमित शाह अज्ज लखनऊ च उत्तर -प्रदेश दिवस आले समारोह च मुख् परौहने होगंन ते आयोजन गी सम्बोधित करगंन। समारोह दा आयोजन राष्ट्र प्रेरणा स्थल च कीता जाहग। श्री शाह होर इस मौके पर “इक जनपद-इक व्यंजन” योजना दा शुभारम्भ करगंन। इस पैहल दे राहें राज्य दे हर इक जिले दे पारम्परिक व्यंजन दी पंछान कीती जाहग ते एहदी गुणवत्ता बधाने सनें ब्रैंडिंग ते बजार तोड़ी पुज्ज दी बवस्था बी कीती जाहग। एहदा मकसद

स्थानी व्यंजनं गी छड़ा कुसै इक इलाके तगर सीमित नई रक्खियै- उसी राश्ट्री ते वैश्विक पंछान देना ऐ। गृहमंत्री होर इस समारोह दे दरान सरदार पटेल औद्योगिक खेतर कार्यक्रम दा बी शुभारम्भ करगंन। ओह उत्तर-प्रदेश सरकार दी मुखमंत्री युवा उद्यमी विकास योजना दे तैहत उत्कृष्टता हासल करने आले जनपदें गी पुरस्कार देगंन। इस मौके पर ओह उत्तर-प्रदेश गौरव सम्मान 2025-26 बी प्रदान करगंन।



India Energy Week

चौथा “भारत ऊर्जा सप्ताह” 27 शा 30 जनवरी तगर गोवा च आयोजित होग। पेट्रोलियम ते कुदरती गैस सरबंधी मैहकमे दे मंत्री हरदीप सिंह पुरी होरें जंदे रोज नमीं दिल्ली च आयोजित संवाददाता सम्मेलन च आखेया जे भारत ऊर्जा सप्ताह -2026 ऊर्जा- सुरक्षा- आर्थिक विकास ते स्थिरता दे बक्खी देश दी प्रतिबद्धता गी दर्शादा ऐ। उनें आखेया जे चंऊ दिनें दा एह आयोजन भारत गी इक प्रमुख वैश्विक ऊर्जा केन्द्र ते वैश्विक ऊर्जा बदलाs च विश्वसनीय प्रतिभागी दे रुपै च स्थापित करोग। पुरी होरें आखेया जे “भारत ऊर्जा सप्ताह” पैहल दी शुरुआत दे परैन्त काफी मजबूती आई ऐ। इन्नै छड़े चार बरें च वैश्विक ऊर्जा कलेंडर च टकोहदी थहार हासल कीती ऐ।



Russia –Ukraine –US Talks

रुस-यूक्रेन ते अमरीका दे प्रतिनिधियें यूक्रेन जंग खत्म करने दे बारे च कल अबुधाबी च पैहले दौर दी गल्लबात कीती। रुस ते यूक्रेन बशकार तकरीबन चंऊ बरें थमां जारी संघर्ष दे दरान एह पैहली बैठक ही- जेहदे च इनें त्रौनें मुल्खें दे नुमायंदें शामिल होए। अमरीकी अधिकारियें दस्सेया जे कल्लै दी गल्लबात बड़ी रचनात्मक ही ते अज्ज बी गल्लबात जारी रौहग। यूक्रेन दे राष्ट्रपति व्लादीमीर जेलेस्की होंरें आखेया ऐ जे रुस दे राष्ट्रपति व्लादीमीर पुतिन होंरें गी जंग खत्म करने लेई तयार होना होग। इक सोशल मीडिया पोस्ट राहें उनें आखेया जे त्रै पक्खी बैठक थमां अजें कोई फैसला कइडना काहली करने ज्नेहा होग ते अज्ज होने आली गल्लबात दे नतीजें पर बी गौर करना होग। तौंआई संयुक्त अरब अमीरात दे बदेश मंत्री शेख अब्दुल्ला बिन ज़ायद अल नाहयान होंरें इनें मुल्खें बशकार गल्लबात दा सुआगत कीता ऐ ते आखेया ऐ जे तनोतनी घट्ट करने दा रस्ता छड़ा गल्लबात दे राहें गै कइडेया जाई सकदा ऐ।

<><><><><><>

Terrorist Killed

तौंआई जम्मू-कश्मीर पुलसै कठुआ जिले दे बिलावर इलाके च सुरक्षाबलें इक महत्वपूर्ण कामयाबी हासल करदे होई पाकिस्तान आधारित आतंकी संगठन जैश-ए-मोहम्मद दे इक सिरे दे आतंकवादी गी मारी मकाया ऐ। इक टकोहदी सूह दी बिनाह पर कारवाई करदे होई जम्मू-कश्मीर पुलस ते फौज नै पड़ेतर इलाके च कारवाई करदे होई आतंकी गी ढेर करी दिता।

<><><><><><>

पर अपने माहिराना विचार सांझे करगंन। कार्यक्रम दी मेजबानी करगंन स्हाडी न्यूज एंकर श्रुति खजुरिया।



Cricket

मर्दे दे टी-20 अंतराश्ट्री क्रिकेट च भारत नै कल रायपुर दे शहीद वीर नारायण सिंह अंतराश्ट्री स्टेडियम च खेड्डे गेदे 5 मैचें दी श्रृंखला दे दुए मुकाबले च न्यूजीलैंड गी 7 विकटें कन्नै हराई दिता। पैहले बल्लेबाजी करदे होई न्यूजीलैंड नै तय 20एं ओवरें च 6एं विकटें पर 208 रन्ज़ बनाए। परते च भारत नै कप्तान सूर्यकुमार यादव दी 37 गेदें च नाबाद 82 रन्जें दी पारी ते ईशान किशन दी 32एं गेदें च 76 रन्जें दी पारी दी बदौलत 15 ओवरें ते दंऊ गेदें च 3 विकटां मुहाइयै लक्ष्य हासल करी लैता। ईशान किशन गी “मैन ऑफ द मैच” घोषत कीता गया।

